

③顧注：《蘇武傳》：匈奴詐言武死，常惠教漢使者詭言，漢天子射雁上林得武帛書，乃歸武。則雁足繫書，後人承訛襲謬耳。

④謝靈運詩：故山日已遠，風波豈還時。

其二

欲雪違胡地，先花別楚雲。却過清渭影，高起洞庭羣。塞北春陰暮，江南日色薰。從《杜臆》，舊作曛。傷弓流落羽，行戶剛切斷不堪聞。次章，傷歸雁而興飄泊之感。違胡地，去秋雁來。別楚雲，今春雁去。過清渭，來時所經。起洞庭，去時所歷。塞北、江南，承上起下，言當此春日，而猶有傷弓落羽，行斷聲哀者，皆窮途旅客所不忍聞也。

①謝靈運詩：季秋邊朔苦，旅雁違霜雪。《月令》：八九月，鴻雁來。正月，候雁北。

②更羸引弓虛發而下雁，出《國策》，詳見十三卷。史：引虛弓而雁落，人問之，曰：「此雁傷弓也。」

江南逢李龜年

朱注：題曰江南，必潭州作也。舊編在大曆三年荆南詩內，非是。錢箋：《史記》：王翳定荆江南地。又：項羽徙義帝於江南。《楚詞章句》：襄王遷屈原於江南，在湘潭之間。龜年方流落江潭，故曰江南。《雲溪友議》：明皇幸岷山，百官皆竄辱，李龜年奔泊江潭，杜甫以詩贈之。

岐王宅裏尋常見，崔九堂前幾度聞。正是《友議》作值江南好風景，落花時節又逢君。此

詩撫今思昔，世境之離亂，人情之聚散，皆寓於其中。

○《明皇雜錄》：天寶中，上命宮中女子數百人爲梨園弟子，皆居宜春院北，上素曉音律，時有馬仙期、李龜年、賀懷智，皆洞知律度。安祿山亦獻白玉簫管數百事，皆陳於梨園。自是音響殆不類人間，而龜年特承恩遇。其後流落江南，每遇良辰勝景，常爲人歌數闕，座上聞之，莫不掩泣罷酒。蔡曰：《雲溪友議》：李龜年奔江潭，曾於湖南採訪使筵上唱：「紅豆生南國，秋來發幾枝。贈公多採摘，此物最相思。」又云：「清風明月苦相思，蕩子從戎十載餘。征人去日殷勤囑，歸雁來時數附書。」此詞皆王維所作也。《舊唐書》：岐王範，睿宗子，好學工書，雅愛文章之士。開元十四年病薨。

○原注：崔九，卽殿中監崔滌，中書令湜之弟。《舊書》：崔湜弟滌，與玄宗款密，用爲秘書監，出入禁中，後賜名澄，開元十四年卒。

○《世說》：過江諸人，新亭飲宴，周顗中座而歎曰：「風景不殊，正自有山河之異。」

黃鶴云：開元十四年，公止十五歲，其時未有梨園弟子。公見李龜年，必在天寶十載後，詩云岐王，當指嗣岐王珍。據此，則所云崔九堂前者，亦當指崔氏舊堂耳，不然，岐王、崔九並卒於開元十四年，安得與龜年同遊耶？

黃生曰：此詩與《劍器行》同意，今昔盛衰之感，言外黯然欲絕。見風韻於行間，寓感慨於字裏，即使龍標、供奉操筆，亦無以過。乃知公於此體，非不能爲正聲，直不屑耳。有目公七言絕句爲別調者，亦可持此解嘲矣。

小寒食舟中作

鶴注：公在潭率舟居，此當是大曆五年作。《杜臆》：小寒食，注謂寒食前一日，誤，蓋寒食次日也。《歲時記》：冬江南逢李龜年 小寒食舟中作